

國朝詩人徵略

國朝詩人徵略卷三十二

番禺張維屏子樹輯

夢麟

字文子號午塘蒙古正白旗人乾隆十年進士官
戶部侍郎有大谷山堂集

乾隆二十二年

命督辦荆山橋河工程三月報工竣

賜戴孔雀翎七月沂水散漫入運爲沛邑害公奉

命與在工諸臣分任責成公之在工也役夫數十萬指咸
畚揭趨事昧旦而興指揮董率日在泥淖中與丁

卒同勞勩故告成較捷然公之疾亦自此始矣公

歿年僅三十有一

春融堂集

午塘先生未弱冠而入詞垣未三十而躋八座且
屢掌文衡進參樞務而其爲詩五言則蕭寥澄曠
七言多激楚蒼涼方處春華之時已造秋實之境
蓋得於天分非人力所能與也

聽松廬詩話

夢文子樂府詩有云遠憶送者此時到家凡行人
初別家時胸中皆有此意却被道出

同上

標題

今年別

七古

朝往香山

五古

雞鳴寺

五古

將赴梁谿道閒作

五古

蘇武牧羝圖

七古

中元舊縣驛夜歌三首

七古

與人哭

七古

河決行

七古

涼甲石歌

七古

摘句

林隙辨歸人時見一回顧

澹靄蒙青岑孤蓬冒疎雨層波生淺涼獨

坐聞柔艣

落日萬古色長江千里秋

荷動觸虛籟竹深流暗螢

帳鉤花影外人夢月明中

邴生薄宦非求達宋玉微辭欲著書

山連熊耳關雲白天入鴻溝朔氣黃

錢維城

字宗盤號稼軒江南武進人乾隆十年

賜進士第一人官刑部侍郎贈尙書諡文敏有茶山集

上命公偕湖廣總督吳公達善往貴州訊獄獄定將旋而

古州香要事起香要苗人力扼虎自詡有邪術鎗

礮弗能傷爲諸苗所憚二十一寨爲所誘將襲下

江同知龔學海告變公因偕吳公及巡撫宮公兆

麟檄黔省各營會剿又以古州壤接湖南廣西移

知各督撫分兵守隘口而自馳赴古州飭副將來

永增守加漚且策之曰賊苗脅從者衆急則并力

阻險勢不能旦夕平宜多懸木榜諭以

天朝止誅首亂餘無所問其黨必疑且散吳公等從之
苗聞日持牛酒詣軍門公慰諭遣去衆心大定明
日督兵入大箐密使人偕生番老雄等伺香要所
至六月八日擒之與其黨皆磔死事平

春融
堂集

標題 定遠山行見田間蓄水有法禾黍暢茂卽

事述懷

七古

摘句 一路杏花發滿山春鳥啼

清磬上明月孤琴流暗泉

風辭昨夜雨雲作早涼天

李因培

字其材號鶴峰雲南晉寧人乾隆十年進士官至
福建巡撫左遷按察使有鶴峰詩鈔

廷試翰詹名列一等第二晉翰林學士視學山左尋
遷閣部游轉侍郎歷戶禮兵刑四部任江蘇浙江
學政十年得士最盛先大父剛毅端嚴雖親子
弟望之生慄歷官數十年矢志清白所至振拔單
寒伸理冤抑風節凜凜每公事叢集悉心裁決夜
分不倦

李氏詩存

摘句 入山不見山但見千層樹絳葉落成雲

出前峰去

花開思媚日樹動欲辭雲

訟庭聞鳥語小市雜溪喧

秋風桂子淮南樹春水桃花洞口魚

子舍京華愁旅食客牀風雨憶同衾

張甄陶

字希周號惕庵福建閩縣人乾隆十年進士官知縣

希周總角卽肄業鼇峰書院潛心經義巡撫奉天

盧公學使奉新周公皆有國士之目

詞科掌錄

四書翼註論文惕庵先生自撰凡例有云講明四子書乃致知格物第一義此書博徵百家凡天官地志國典兵機食貨律例方技與一切雜說果於聖經源流相涉一一攷證會通不特臨文者可以開拓心胸增長筆力卽登朝服官皆有所助

松心日錄

自高頭講章盛行幾變秀才爲學究惕庵先生四書翼註論文一書爲習舉業者增其見聞擴其才識較之尋常講章實爲遠勝先生初舉鴻博後成進士入詞垣散館外用爲知縣未久不獲展其所蘊而主滇黔書院講席前後十有六年反覆刪訂

乃成是書其用心良苦其爲院長也名達

九重獲邀議敘宜哉

聽松廬
文鈔

惕庵有往事無根盡到心句極沉着

聽松廬
詩話

摘句

身是魯儒三黜慣思同楚客九悲深

不才底日成投筆善病經年累倚閭

誰與益者成三友欲往從之付四愁

病骨那堪空冀北羈心祇是望江南

朱珪

字石君順天大興人乾隆十三年進士官至大學士贈大傳諡文正有知足齋集

公以雍正九年正月十二日生于盤屋縣公祖與高安朱文端公同省爲知縣相友善公父受經于高安故公十一歲卽傳高安之學年十三丁母艱孺哀毀瘠服除補附學生年十七科試第一舉于鄉與叔兄齊名次年會試中式

賜梁國治榜進士出身改庶吉士習

國書座師阿文勤公劉文正公鄂剛烈公皆以學行重之乾隆十六年散館第一授編修明年大考二等授侍講二十三年大考二等授侍讀學士公所撰進文冊陳宮中

高宗純皇帝亟賞異之特達之知實始于此二十四年主
河南鄉試復

命旋奉使告祭南嶽登祝融峰明年充會試同考官秋授
福建糧驛分巡道抵閩兼攝福州府事毀和合等
諸淫祠民大驚服二十八年

特旨擢福建按察使兼署布政司閩人裘自位假平臺灣
功鬻武職獄連數十人公誅正犯一人諸受欺者
皆不坐有告家譜妄逆者讞之僅戮一撰譜者屍
不坐其子孫二十九年秋丁父憂戴星奔抵京治
葬三十二年服除補湖北按察使三十三年調山

西按察使明年授山西布政司秋奏立保固城工
法令後任隨時修護如隕在三十年內與原築官
分賠下部議行三十六年暫代巡撫事奏撥歸化
綏遠二城穀十萬石配放兵糧以省採買而免紅
朽奏免土默特蒙古私墾之罪以所墾無礙牧地
三千一百餘頃許附近兵民認耕納租歲六千餘
兩增官兵盤費皆下部議行三十八年勘歸化城
水災奏撫卹之且予修費借穀種三十九年按察
司黃檢奏公終日讀書于地方事無整頓明年入

覲授翰林院侍講學士四十一年

命尙書房行走侍今

皇帝學時初置

文淵閣官

特授公直閣事主福建己亥鄉試四十五年督福建學政
將行上五箴于今

皇帝藩邸曰養心曰敬身曰勤業曰虛己曰致誠
上力行之及

親政亦常置座右四十八年冬還朝明年扈

蹕南巡授內閣學士兼禮部侍郎閱浙江江蘇召試

卷五十一年授禮部侍郎主江南鄉試督浙江學

政五十四年冬還朝充經筵講官五十五年

經筵進講

高宗純皇帝顧

今上曰此汝師傅講之善春總裁會試秋授安徽巡撫

命馳驛賑水災乃賑宿碭山靈璧泗五河盱眙民以糧借

懷遠鳳台壽民以糧及種築決隄六十餘丈民乃

安復請展春賑五十七年奏鳳潁水災

恩賞糧種免民欠萬五千兩祁門縣築城成輕騎往驗之

至新嶺有欲巡撫怒其歛縣令屬掌亭人以饘餽

進者公恬然飽之五十九年調廣東巡撫六十年

兼署兩廣總督咲咭喇國入貢呈土物于總督卻之嘉慶元年征苗調兩廣兵萬二千親調遣之夏授兩廣總督兼署巡撫六月奉

旨內召云將欲用爲大學士也俄以閩浙總督魁倫奏粵東艇匪駛至閩浙乃公任內不能緝捕之咎寢前命仍加

恩補安徽巡撫鳳陽等州有水災蒙

恩賑親給之官吏無敢侵者時楚豫多邪教流言安徽有隱伏者公曰疑而索之是激之變也乃親赴界上籌防禦徧莅潁亳等州城鄉聚長老教勸之徧張

告示簡明諄切民大感化明年授兵部尚書留巡撫任宿靈壁水合肥定遠巢來安全椒旱親賑之明年蒙亳復水卹賑如之

高宗純皇帝上賓于天今

皇帝初親政卽馳驛召公公哭且奔先上奏曰聞

太上皇帝龍馭上昇膽裂呼天角崩投地欽惟

大行皇帝十全功德五福考終傳器愜心於昭在上我

皇上純性超倫報天罔極竊聞定欲躬行三年之喪此舉

邁千古而欽萬世然而天子之孝不以毀形滅性

爲奇以繼志述事爲大親政之始遠聽近瞻默運

乾綱濶施渙號陽剛之氣如日重光惻怛之仁無
幽不浹思修身嚴誠欺之介於觀人辨義利之防
君心正而四維張

朝廷清而九牧肅身先節儉崇獎清廉自然盜賊不
足平財用不足阜惟願我

皇上恆久不忘堯舜自任之心臣敢不隨時勉行仁義事
君之道

上嘉納之及至京哭臨

上執公手哭失聲旋

命直南書房管戶部三庫自是凡

國家大政有所咨詢皆造膝自陳不草一疏不沽直
不市恩軍機大臣不相關白公第在外城遠且隘
賜第西華門加太子少保充實錄館總裁

國史館總裁己未會試總裁冬調戶部尙書時

上禁浮收漕米之弊外省以運丁貧仰資州縣州縣取民
不得不浮于是安徽有加贈銀江蘇有加耗米之
請部議將擬行公思之不寐綜其數較原徵加倍
乃決計駁曰小民未見清漕之益先受加賦之害
不可行竝令漕司以後凡事近加賦皆議駁以體
皇上損上益下之意長蘆鹽政奏鹽價一斤加錢二文公

駿曰前蘆東因錢價過賤已三加價又免積欠二百六十萬兩餘欠展三年商力自寬且今錢價漸貴所奏應毋庸議廣東布政司奏陞濱海沙地賦公駿曰海沙淤地坍漲靡常是以照下則田減半賦之今依上中田增賦是與沿海民計微利非政體且民苦加賦必多坍豁別有漲地亦不肯墾不可行倉場衙門請預納錢糧四五十倍準作義監生公駿曰國家正供有常經而名實關體要于名不正于實有傷斷不可行凡駿議皆親屬藁奏

上皆韙之六年陪祀祈穀壇未曙誤行墜甬道下傷左跨

賜醫

賜食絡繹于道七年以戶部尚書拜協辦大學士九年春
駕幸翰林院

賜宴聯句

御書天祿儲才扁摹刻院堂以墨蹟

賜公第公在翰林爲二十四科前輩資最深且掌院事領
袖清班瀛洲典故盛且榮焉十年正月宣

制拜體仁閣大學士管理工部事明年春公感寒多痰嗽
肝火觸右目微眚時公年七十六矣九月奏乞休
上曰待八十當爲壽旋

賜詩十韻及玉鳩杖每

召對則預定召對後期十一月庚午寒甚

召對畢降階忽痰壅歸第

上遣侍衛領醫官來視疾疾少差

賜假兩月十二月乙亥坐外軒作芻獻詩有云天道神難

測民心惟一中知人可安衆

居所自持公

上將

親臨公第丁丑復

命戶部尙書戴公來夜逾子痰盛氣微遽薨是五月戊寅

也報聞

上震悼己卯

上親臨奠三爵哭不止

特賜諡曰文正庚子葬于二老莊呂郝舊阡明年

御製碑文刻石阡門

經室集

公豐厚端凝中和醇粹爲仁若渴抗義不撓坦白
公誠絕無城府于經術無所不通漢儒之傳注氣
節宋儒之性道實踐蓋兼而有之取士務以經策
較四書文誠心銳力以求樸學佳士之文未薦被
落者讀而泣之公布政數省平餘銀鉅萬悉不取

撫安徽裁蕪湖關陋規閩省洋商陋規事發

欽使莅治獨公實不受一錢公官于外厓岼廉峻中朝大
官絕無所援管部事持大端不親細事數十年清
操亮節人皆仰之公事父愛敬本于天性父杖兒
跪而以身蔽受之慟母氏早歿事庶母謝幾如母
事諸兄悲愉如一體事寡嫂盡敬撫諸兒子如己
子公年四十餘卽獨居迄無一妾

御製抒痛詩有云半生惟獨宿一世不貪錢知之深也

同上

參政兄弟少入翰林卽以高文典冊照耀蓬萊華
蓋之間爲藝林所仰垂三十年然其尙名教敦清

節世或未盡知也任山西布政使司以方正爲巡撫所嫌謂其不諂吏治由是仍改官翰林久之

上深知其公正廉潔累擢用爲巡撫而參政愛才下士士以此望而趨之昔韓忠獻爲中正所歸而於元祐諸賢未嘗徇葉文忠爲清流眉目而于東林君子亦無私好參政蓋深得此意者也

湖海詩傳

標題 定興道中月夜觀雪

五古

謁東坡亭

七古

摘句 文章金薤重富貴白衣輕

書生何有銅鑄柱宦跡或可山畱龕

忠義神仙同脫屣漫將尸解擬劉安

詠顏平原

圖轄布

字裕軒滿洲人乾隆十三年進士官翰林院侍講
學士有枝巢詩草

劉文正公曰圖學士不忽于微不愆于隱

雅頌熙朝

晚年卜居阜城門外之池水村有園圃竹木之勝

遺命歿後弔吾墓者薦寒泉而已勿以葷酒

同上

摘句 田園三徑僻風雨一蓑寒

畦塍當午靜花竹隔簾清

雨裏荷鋤春早晚磯邊把釣水西東

卻憶嘉陵江上路萬山深遶一舟行

凌魚

字西波號滄洲廣東番禺人乾隆十三年進士官知縣有書耘齋集

榜下分發楚南歷任桂陽昭陵醴陵諸縣廉介明敏案無畱牘在桂陽政暇輒進邑諸生講授經義而嚴課試之文風丕振續修縣志考核詳明尋歸養大母遂不出以讀書敦行敘其鄉人

廣東通志

凌西波觀黎忠愍公畫像詩云運移亦知大事去

不忍報國虛無人能說出千古忠臣心事

聽松廬詩話

標題 結襪子

七占

耕田歌

七古

鄉賢八拜詩

七古

張文獻公 余襄公 崔清獻公 李
忠簡公 邱文莊公 陳文恭公 湛文
簡公 海忠介公

摘句 一跌易如登白簡半階難似上青天

林明倫

字穆安號穆庵廣東始興人乾隆十三年進士官
衢州府知府有穆庵集

穆庵廉靜寡欲反復於宋五子之訓有得於心以

編修出知衢州府卒時年僅三十五

梅崖文集

惲子居數稱穆庵文余未得見當畱心覓之

松軒隨筆

摘句 捐生片語易仗義五人同道直心寧悔名

存死不空

五人墓

陶世鳳

字威仙號雲門浙江會稽人乾隆十五年舉人官
澳門同知有雲門牋稿

世鳳知新興縣監生趙簡祥合七邑匪徒歛盟爲
不軌世鳳飛檄上聞躬率壯勇猝禽其魁獲逆名
簿佯笑曰封官授職是優伶演劇所爲詎可呈上
官耶當衆焚之反側乃安縣民立祠報德

廣東通志

摘句 山帶曉雲橫別浦樹含春雨散遙天

意超得自腸迴九句鍊真同肱折三

欲訪雪堂何處是滿江煙樹到黃州

余慶長

字元亭湖北安陸人乾隆十五年舉人官成都府同知有壬癸詩藁

元亭爲予撰銅政考八十卷釐然畢具

湖海詩傳

摘句

知有小園屬開府可能大樹號將軍

子瞻詩和陶彭澤漫叟歌招孟武昌

劉墉

字崇如號石庵山東諸城人乾隆十六年進士官

至大學士諡文清有石庵詩集

文正公清德重望雅不欲以詞章自見先生如之
先生手書近詩見示清新超悟有香山東坡風格
十餘年所得甚夥門人陳子韶因合梁侍講同書
書鐫于西湖上名劉梁合璧湖海詩傳
諸城文正文清兩公非徒爲宰相且爲賢宰相天
下仰之此

聖翰所以特許爲海岱高門第也

聖經室集

劉文清書初從松雪入中年後乃自成一家貌豐

骨勁味厚神藏不受古人牢籠超然獨出

松軒隨筆

摘句 五鼎薦八珍孰曰非正味饗人病未能謬

云太羹貴

爲學患不知既知苦未勇護疾而忌醫見
藥反增恐

乾坤秘清氣一縷入肺腑

譚尙忠

字會文號誨亭江西南豐人乾隆十六年進士官
至吏部侍郎有綴芳齋詩集

公之在戶部也嘗司寶局及

高宗純皇帝察局中事惟公無纖豪私染在興泉時以洋
行事例降官而

上又察知其不汙故復進用其在封疆爲大吏室中澹如
寒士遇屬員甚有禮藹然親也獨不能少入之以
財利天下論吏清儉者必舉譚公爲首然公遇事
奮發則執誼不可回其爲安徽巡撫以忤和珅致
降爲福建按察使故公雖和平廉潔而非煦煦曲
謹者也其教子有曰人當先約其身身約則心約
心約則事不踰閑然後可以擴充爲有本之事功
矣故公所至興利去害必究其原委曲折斷然行
之使所蒞必蒙其澤去則民多涕泣送之

惜抱軒
文集

粵東百餘年來大吏遺愛在民而去思最深者莫

如李恭毅公

湖次

譚公

尚忠

譚公爲按察嚴治

盜賊尤加意懲治匪徒之害民者訪拿確實卽以重枷枷斃於是匪徒斂跡而良民感恩蓋粵東之患莫甚於盜賊然其始不過兇頑之徒耳彼習見犯法者未必卽罹于法也乃無所畏矣卽罹于法而罪名不至死不過軍耳流耳彼又習見軍流之犯往往脫逃而歸也乃益無所畏矣至于無所畏而糾衆行劫擄人索贖放火搶奪諸惡皆作而鄉民受其毒害有吞聲飲泣而莫敢控告者譚公重枷之法行速而衆著使匪徒皆知兇橫者旬日之

間可柳斃也庶幾聞風而知畏耳故大吏不必求
爲民興利也能實心爲民除害而無形之利已溥

矣

聽松廬
文鈔

摘句 雲橫遠岫衣千摺水落平橋帶一圍

獨坐孤帷難自遣細研松露寫秋蘭

湯世昌

字其五號對松浙江仁和人乾隆十六年進士官

御史有嘉藻堂集

公成進士時閏五月

朝考詩題爲閏月定四時公作四詩已違式不錄

上時亦賦此題求佳卷不可得大臣以公卷進

上大加褒賞取其綵絲真續命競渡繼清音二句定爲第一入翰林公性剛直嘗踵座主劉文正公門閤人以他客拒公且作倨傲狀公怒曰而公大賢果縱而如是耶手批其頰聲達戶內於是文正延公入謝不敏焉後保舉御史文正卽以公名上擢工科給事中封事數十上時人號爲湯多諫云

兩浙輶軒錄

摘句 徑穿雲縹合灘接石梁橫

周於禮

字綏遠號立岷雲南嶠峨人乾隆十六年進士官

大理寺少卿有聽雨樓詩草

少卿性耽吟詠又嗜書法爲侍御時暇輒行琉璃
廠書肆見有佳者隨時售之宋元石刻旣多真蹟
尤不少取褚顏蔡蘇黃米六家先勒于石旋以疾
終所居聽雨樓在神匠胡同爲明嚴介溪別墅

國初徐健菴尙書居之繼歸于溧陽史文靖公其後
分爲數處畢君秋帆得之爲燕會觴詠之地及秋
帆出爲觀察遂歸少卿迄今三十年是樓不知誰

屬石刻亦無可攷

湖海詩傳

摘句 片石真存漢無絃亦賞音

武侯祠石琴

飽經棧閣千重險還對秦川一掌平

出陳台

國朝詩人徵略卷三十一

國朝詩人徵略卷三十三

番禺張維屏子樹輯

惠棟

字定宇號松崖江南元和人諸生

先生自幼篤志向學家多藏書日夜講誦自經史諸子百家雜說靡不津逮中年課徒自給陋巷屢空處之坦如乾隆十五年

詔舉經明行修之士總督尹文端公黃文襄公交章論薦有博通經史學有淵源之稱惠氏世守古學而先生所得尤深擬諸漢儒當在何邵公服子慎之間

撰有周易述易學易例古文尚書攷左傳補注九
經古義明堂大道錄禘說精華錄訓纂後漢書補
注九曜齋筆記松崖筆記松崖文鈔諸史會最先
生卒於戊寅五月年六十有二

潛研堂文集

先生于易理尤精凡鄭君之爻辰虞翻之納甲荀
謂之升降京房之世應飛伏暨六日七分世軌之

說悉爲疏通證明

春融堂集

先生序吳企晉詩謂詩之道有根柢有興會根柢
原于學問興會發于性情二者兼之始足稱一大
家先生不多作詩而此論極精當

聽松廬詩話

摘句 若使當年傳漢易王韓俗學久無存

蔡 龍

字文舟江南崑山人貢生官訓導

先生教人以躬行實踐讀書好古爲宗

春融堂集

先生臨終爲文以戒其子有云虛文無益末俗不
經俱應捐除毋嫌駭聽倘有觀未喻以爲子道有
虧可取遺命示之先生此言實堪取法近時喪禮
專尙繁文以侈費相高以美觀爲孝世俗之見難
以破除惟賴有德望之君子以身作則爲鄉里先
庶幾崇實黜浮不至流而日甚耳

松心
日錄

摘句 長貧甘吏隱多病忝官箴

葛景中

字運乘號若湖江南崑山人貢生官訓導

先生教授諸生爲詩學溫岐韋莊

湖海詩傳

摘句 錦囊句好題新畫石鼎茶香讀異書

閒居賦就霜凝鬢夢友詩成月滿梁

尙有故交畱白社更無殘夢到紅樓

東方自昔常求米南郭於今且據梧

沙維杓

字斗初江南長洲人有耕道堂集

斗初與張崑南號兩布衣斗初隱於商來往江西

湖北間長髯巨額如酒豪劍客

湖海詩傳

摘句 樹近俯鶴巢燈遙辨漁艇

蔬圃半藥草禪榻多儒書

壁險猿挂藤水清魚避網

岼高崩積雪船響犯流澌

張 崗

字崑南號古樵江南長洲人有鶴健堂詩鈔

崑南隱於醫豐頤紅頰神情怡曠閒好古琴詩多

清和閒適之趣

湖海詩傳

摘句

曉鐘雲外斷春樹雨中深

桃花一夜雨春水半帆風

天空一雁來胥口木落諸峰見洞庭

老去杜陵猶作客病來摩詰愛逃禪

許燦

字衡紫號晦堂浙江嘉興人諸生有晦堂詩鈔

晦堂以尊人辦駝官逋對簿甘州著燉煌集追事

自言歸杜門課徒著梅里詩輯三十卷

兩浙輜軒錄

摘句 湖雲多上樹山雨忽如烟

詞臣善頌元和聖小雅仍歌吉甫功

西極若徠千里馬東封請用一九泥

邊丁日課屯田麥使者星馳屬國瓜

高鳳翰

字西園號南阜山東膠州人官縣丞有擊林等集

西園工書畫豪於詩具經濟才則世罕知者山左詩鈔

病痺廢右諸任事以左手更號尙左生同上

南阜畫山水以氣勝善草書嗜硯著有硯史畫徵錄

西園以雁字詩受知于尹文端公公調任雲貴猶

行文布政司令遇缺卽題其愛才如此聽松廬詩話

摘句 愛民勿使驕驕則長戾氣東吏勿使苦苦

則少生意

壯士愛寶刀名士愛寶硯

客是故人新白髮地經初到舊題詩

不妨李固終成黨到底曾參未殺人

自拂綠茸隄草坐菜花香裏看春山

落霞點出簪花格驟雨催成急就章

雁字

沈大成

字學子號沃田江南華亭人貢生有學福齋集

學子壯年在潘敏惠公思渠幕府晚年偕惠徵君

寓官梅亭益以學業相砥礪三禮注疏杜氏通典

皆手自校勘丹黃爛然後館于江鶴亭春家編次
詩文集共六十八卷無子沒後鶴亭刻以行世其
詩出入唐宋杭堇浦太史謂以學人而兼詩人者
信也

湖海
詩傳

摘句 遠水檣帆小孤村桑柘深

香泥雙屐滑春草一庭寬

邑小人稀風色緊江寒天濶雁聲多

萬事逡巡成白首一年容易又黃花

朱方藹

字吉人號春橋江南桐鄉人貢生有紅橋載酒集

春橋門第清華風神雅令詩賦之餘兼通畫理披

麻沒骨無所不工

湖海詩傳

標題

觀伏波銅鼓聯句一百二十韻

五古

摘句

竹色侵經閣松風和梵音

陶元藻

字龍谿號篁村浙江會稽人諸生有泊鷗山房集

篁村客揚州時盧抱孫轉運大會名士紅橋卽席

賦絕句十章一時傳誦倦游歸里於西湖築泊鷗

莊以撰述自娛有全浙詩話六十卷疊亭詩話二

卷越彥遺編攷五卷越畫見聞三卷

兩浙輶軒錄

摘句

欲語性情思骨肉偶談山水悔風塵

我似漁人原泛泛誰稱桑者獨閒閒

野老門庭雲亦嬾荷花世界夢俱香

諫草文章唐宰相樓船弓弩漢將軍

廣州城樓

若計揚州二分月紅橋應占一分多

江昱

字賓谷號松泉江南江都人諸生有松泉集

瀟湘聽雨錄江昱撰辨衡山岫嶠碑一篇考究詳

明知確出近時僞撰尤足祛千古之惑

四庫提要

摘句 斜日明孤塔寒江遶廢城

國朝詩集卷三十三
老蓮吹香酒初醒白月挂柳魚跳波

蟲鳴廢院僧鋤菜葉滿空廊客看碑

微力辛勤營壘燕殘聲酸苦別枝蟬

移居

馮公亮

字石門廣東南海人官福州府同知有白蘭堂稿
先生弱冠補諸生食餼以明經貢成均北闕薦不
售援例筮仕通判常州調漢中以廉幹稱擢奉天
遵化州牧引

見以親老奏願歸養母蒙

特恩改授福州府理事同知人以爲誠孝能感動

至尊云後引疾歸結屋濠畔與朋舊觴詠其中

聽松廬文鈔

先生曾孫啓颺丁丑進士選庶常余妹壻也

松軒隨筆

摘句 閒愁似飛雪入酒卽消融

江雲秋化水天月夜通潮

民風淳樸藏官拙衙宇荒閒面嶺開

青畦雨過桑園茂綠浦潮平鴨陣歸

羅元煥

字超掄號章山廣東南海人諸生有萬石堂稿

章山歲暮懷人絕句五十首陳仲鴻爲之註名曰

粵臺徵雅錄百年來詩人韻事略見一斑

聽松廬詩話

摘句 臯馬同時文士重荆高亡後酒人輕

王景

字日永廣東番禺人諸生有柳塘集

雍正乙卯舉鴻博未就

粵東詩海

摘句 會見南園增俎豆合憐東井聚星辰詩歌

易續千秋調姓字難磨一代人

喜後五子配享南園

五先生祠

陶璉

字夏重號東籬浙江嘉興人貢生有東籬詩鈔

夏重天才英異風發泉湧而筆之所至皆合於規

矩湖海詩傳

摘句 倚幌家家月開門樹樹秋

敗荷秋水驚疎柳夕陽蟬

把酒但將杯送老工書苦被墨磨人
徘徊破甑原無益嘆息炊桐竟不聞
父子名同高士傳公侯禮下布衣交

張棟

字鴻勳江南震澤人貢生有看雲吟稿

鴻勳情性和藹工于山水行滕所至羣訂編紵之
交詩中有畫然亦有畫不到處湖海詩傳

國朝詩人集卷三十三
摘句 客至驚啼鳥人歸踏落花

山靜餘寒燒潭空響夜漁

流水聲中停客舫夕陽影裏挂漁簪

空山落木散秋影孤館月明生夜涼

陳華封

字祝三號復齋廣東順德人太學生有復齋詩鈔

獨漉先生孫世居羊城育賢坊以詩世其家杭堇

浦贈以詩云習嬾時欹枕甘貧早閉門

粵臺徵雅錄

摘句

補天雖未能拈花曾點首

有石狀如佛手先世所遺

苦持當日志論定百年身

奉酬堇浦先生賜題先祖遺像

耿國藩

字介夫號湘門湖南長沙人太學生有素舫齋詩鈔

湘門上舍題素舫齋壁詩云背郭臨濠靜不譁一軒深築抵山家茶烟出戶常縈樹池水過籬欲漂花小睡手中書未墮半酣窗下字微斜叢蘭不合畱香久勾惹喧蜂入幕紗

隨園詩話

湘門悼亡詩云屈指于今廿載餘中間十二載離居高堂今日悲于我子職能兼較勝余又悼李姬詩云當時讀我悼亡詩未及終篇涕共垂今日記

將泉下去從頭說與女君知此二詩於缺陷中想

見湘門家室之淑

嶺海詩鈔

外大父耿湘門先生十一歲賦詩黃鶴樓有高低
紅樹迷江渚斷續青山繞鄂州之句座客驚異稍
長以飢驅橐筆之燕齊吳越爲諸侯客繼乃入粵
業鹽筴遂家焉結屋濠畔顏曰素舫齋花竹圖書
布置幽潔又有似兩軒取坡公語無事此靜坐一
日似兩日意也性灑脫工書好爲詩一時粵中及
游粵諸詞人咸樂與交邀月評花飛觴擊鉢佳辰
令節坐客常滿然先生意中不輕許可所師事者

杭堇浦何西池兩先生友事者陳祝三華封馮箕

村公侯

張紫峴

九鉞

數人而已先生每夜輒飲酒

數杯酒後隨意作大小字一夕燈下大書兒女債

完生白髮利名心澹愛青山十四字書畢目垂家

人以爲倦請息先生復提筆書還可支得住五字

少頃痰上端坐而逝年六十二

聽松廬
文鈔

馮潛齋太史爲湘門先生像贊云蒼松其神白璧

其質孝友辛勤信義超拔詩步白蹤文循歐轍素

觚棲遲長歌不輟論者以爲非溢美云

同上

先君少孤貧湘門先生一見卽欲以女妻之人曰

其家甚寒先生曰非爾所知也卒以女歸于先君
是爲吾母耿孺人先生歿未久二子及壻數人皆
相繼下世存者惟先君人謂先生有先見云

同上

標題

訓子

五古

五十治棺歌

七古

摘句

那識爲歡處偏思已故人

紅翻東海三更浪翠立南溟萬點山

浴日亭

肺病小蘇催煮酒吟聲偶住爲焚香

誰思失馬還來馬人若呼牛便應牛

病與老如膠見漆懶逢閒似芥投針

棺壙預爲還製此可容消受一爐香

自題
真容

何士容

字南園江南江都人諸生有南園詩集

袁簡齋大令云金陵有兩詩人一爲陳古漁一爲

何南園陳詩矯健何詩清婉

羣雅集

摘句 閒因省事得老爲課孫忘

茶苦有餘味蘭幽無驟香

月遲防睡早詩富補家貧

才子趨世拙詩到近情工

陳毅

字直方號古漁江南上元人太學生有古漁詩槩

古漁工詩好友尹文端督兩江欲延爲鍾山書院
諸生說詩古漁呈詩有餓夫爲將一軍驚句議遂

寢選有所知初二三集

羣雅集

摘句 節隨新火改月與故人來

紅杏雨中村店小綠楊風外酒旗偏

未必世情如此薄須知秋氣本來清

秋雲

方正澍

字子雲江南歙縣人諸生有伴香閣詩

方居士忘情仕進樂志衡門今之賈浪仙羅昭諫
也詩工于體物一聯一語唐人得之皆可名世何

止一一鶴聲飛上天與袁簡齋太史流寓金陵激
揚風雅詩壇爭長照耀江東居士賃屋長干索居
屏跡于時詞客罕有韻昂故袁有論詩絕句云金
陵從古詩人少近有南園與古漁更有閉門工索
句無人解扣子雲居

吳會英
才集

標題

投壺三十韻

五古

弄盆子歌

七古

摘句

江遠帆如定風狂石欲飛

衆峰孤寺得一澗數邨分

煙蘿挂壁疑無路日月行空似有聲

蓮花
峰

高閣紅扶臨砌樹小亭青受隔江山

風急忽疑星欲墮舟移如與月同行
漁樵來往能行意仙佛虛無易得名
空山雲與人爭路破寺風隨虎打門
酒幔隔花人問路漁莊臨水鴨知
一院綠天栽竹地滿身紅雨折花人
酒因賒得餅難滿書爲催成字易訛
交廣易添離別恨學荒翻得性靈詩
花事雨多俱寫意俗人交淺易忘名
也知佳句原關命偏是庸流每忌名
西去斜陽東上月一般花影有寒溫

徐大椿

字靈胎號洄溪江南吳江人

余弱冠卽聞吳江布衣徐靈胎有權奇倜儻之志
不得一見庚寅七月患臂痛乃買舟訪之一見懽

然年將八十猶談論生風

隨園詩話

二百年來名醫以葉天士爲第一臨證指南一書

中多精要之語然係門人輩綴輯而成非先生至

定學醫者必先明於靈素及仲景諸書乃有定目

若初學而讀臨證指南吾恐其不善讀而致誤

也同時徐靈胎亦以醫名於時著有醫學源流論

蘭臺軌範傷寒類方難經釋諸書學識俱深饒不
及葉先生之變化他如江西喻嘉言極高明矣不
及葉先生之篤實福建陳修園有卓識矣不及葉
先生之小心至若張景岳於醫道未免粗浮其書
功不補過而時醫多宗之無怪乎不死於病而死

於醫者之多也

聽松廬
文鈔

徐靈胎有道情數首其刺時文一首有云案頭放
高頭講章店裏賣新科利器讀得來肩背高低口
角噓唏甘蔗渣兒嚼了又嚼有何滋味此雖有激
而言然世間但熟幾篇時文倖獲科第便自以爲

能讀書者不可不內省而自愧也

松軒隨筆

摘句 一生那有真閒日百歲仍多未了緣

滿山靈草仙人藥一徑松風處士墳

白題墓門

方秋白

字希文一字寄村廣東南海人有萍跡草

寄村好遊北至燕薊南極河滇足跡萬餘里

嶺海詩鈔

摘句 鐘寒鯨吼水海白蜃沉星

沙痕驚樹失陰火挾魚飛

紅日影中天地正青山呼後帝王尊

洛陽

過去事多成代謝到來人又感飄零孤忠

未可論成敗正氣還能亘日星

零丁洋

查岐昌

字藥師浙江海寧人諸生有吳趨江上諸集

藥師爲初白先生孫詩句新異而散體文尤有法

度

湖海詩傳

摘句

澤國稻粱肥鼠雀海天雲雨混龍蛇

村居

何須解語能傾國自喜居卑不染泥

觀荷

流盡舊家簾幙影秦淮依舊水如羅

徐堅

字孝先號友竹江南吳縣人貢生有親園詩鈔

友竹工隸書喜篆刻尤長山水游楚南依陸朗夫
時朗夫病且貧而友竹盤桓不忍去至護其喪而
歸世因此益重焉年八十餘乃卒

湖海詩傳

摘句

山靜傳齋磬林疎出茗烟

燕歸新雨後人去落花前

孤城背嶺千家暝萬派朝宗二水分
鳥啼深樹初催麥雨散低簷正熟梅

薛廷文

字鳴上號鹵齋浙江嘉興人有聽雪齋詩鈔

薛鹵齋五十未娶有除夕詩云獨送窮愁獨埽塵

一回除夕一傷神來朝記取年多少不敢分明說

與人誦此覺雉朝飛篇徑直乏味

南野堂筆記

摘句 雪後春歸樹花前客到門

斷烟微有色殘雨漸無聲

荷花折得不連藕儂在湖時郎在城

陸藝

字樹人雲南昆明人諸生有漱亭集

樹人以武將世家耽心綳素與其兄藻對牀風雨

翰墨共娛江坪工詩樹人兼能畫滇人目爲二難

陳大令文燦而外莫能及也

湖海詩傳

摘句 野水明殘照村墟入暮烟

寒燈情話堪通夜暮雨離懷又到秋

張大進

字海門廣東番禺人諸生

海門博極羣書文筆奧衍會學使者出教詣粵人

廢學海門不平奏記稱曾讀三千卷能背誦千卷

惟所試使者噤不發士林快之

嶺海詩鈔

標題

羅浮龍葱竹歌

七古

摘句 天地大父母諸子咸樹立胡爲自相賊恐

令真宰泣

雲樹有情人浩蕩水天無際月嬋娟

童鉦

字二如號二樹浙江會稽人有二樹山人詩稿

鉦客河南修一省三十六縣志條例謹嚴

紹興府志

二樹與同郡劉文蔚沈翼天姚大源劉鳴玉茅逸

陳芝圖結社聯吟稱越中七子

鳧亭詩話

二樹善畫梅畫成輒題一詩詩亦佳故有萬樹梅

花萬首詩之句可稱二絕

梧門詩話

畫梅極多自爲詩云寫梅只合號梅癡長爲梅花

過六時記得甲申元日集三千三百十三詩

同上

古今好詩讀者每心知其妙口難說童二樹詩云

如鹽著水中其味飲者受可謂善於形容

聽松廬詩話

摘句 早煙山際重春霧水邊多

看花蜂立帽問水鷺隨人

蟻閒緣水過蜂健負花歸

故交多老矣此別倍酸然

古木畱殘雪寒鴉守夕陽

斜陽樹老丹青嶺小雨雲低水墨天

湖雲挾雨當窗過春水浮天上樹來

花猶解媚開如笑水不忘情去有聲

捨身峰頂搜殘碣減食囊中買僻書

秋聲如雨不知處落月似霜還照人

詎有庚寅同正則敢誇丁卯是前生

黃盛

字穎之廣東南海人諸生

穎之十試九冠其曹晚以負才失路大去其鄉諸

同好徧訪之積十數年莫得也

嶺海詩鈔

摘句 楊柳春風軟桑麻夜氣溫此中有真趣難

與外人言

紅顏終白骨紫陌忽青蒿

但求閬苑三天近那識王都五府虛通天台

楊 屋

字子載江西南昌人貢生有恥夫詩鈔

蔣心餘先生哀楊子載詩云亡友誰最賢早死痛

楊屋屋爲將門子靈關世其守又云新詩自淘鍊

收縮筆逾陡又云別來得君書規戒多善誘觀此

可以知子載之爲人矣

聽松廬詩話

隨園詩話誤以何在田句爲楊屋詩同上

摘句 莫爲遠遊子遠遊母心悲遊子有懼顏母

悲無已時

君如再生世復我爲朋友

哭趙山南

雲影忽離地松聲時到門

春色遠來如舊約 國恩閒我是書生

繞盡亂山逢上已乍爲遠客是今年

千里寒江一飛鳥半山斜日兩歸人

汪輒

字輦雲江西武寧人貢生有魚亭集

輦雲少孤貧刻苦向學懃直重氣誼

江西詩徵

心餘又有哀汪輦雲詩云汪生東野儔五窮不可

送浩歌振頽響其才實天縱袁簡齋云乾隆初江

西有四子楊

屋汪

趙

由儀

蔣士銓

是也

聽松壺詩話

摘句

人生不立業倉卒同蜉蝣

天上與人間佳期皆草草

七夕

斷厓懸朽棧孤影在斜曛

彭雲鴻

字夷鵠號儀庵江西寧都人貢生有咄咄吟諸集

儀庵以優貢補教習選訓導卒著有情話編

江西詩徵

彭儀庵詠介之推云一朝賞弗及抱憤去邦國偕

隱愚老親火烈山盡赤忠孝兩無憑舉動成褊賊

語雖翻案未爲過刻

聽松廬詩話

摘句 我不卽子曰把子詩子不見我出入倭遲

天高月白可以相思

猶可忠言悟應無亡國人

原

貧妻莫笑張儀舌老母殊憐李賀心

幾人能了生前事作客空添別後情

平生自擬無懷傳他日誰題有道碑

人言卽是封侯相三十年來記不真

成婦詞

劉文蔚

字豹君號柳亭浙江山陰人貢生有石颿山人集
山人性真摯戚友告急雖家無餘資必力圖以應

舉優入太學譽滿都門以親病南返教授里中門
下士科第相繼而山人獨以明經老

越風

摘句 程無十里遙徑有千盤曲

水勢趨藤縣山光接柳州

潯城北樓

一笑推篷雲亂飛遠天如夢青山小
鱸膾白浮番舶遠佛桑紅壓戍樓開

朱 質

字二亭號市人江南江都人諸生有二亭詩鈔

二亭居揚州城北陋巷狹室而其胸次超然塵埃

之外放情山水吟詠自適以至老死

惜抱軒文集

揚州詩人窮而在下而能一洗俗調者近惟如臯

江片石江都朱二亭二人

盟鵬啟
筆飛

金徵君

農

客邗上老且病市人延之于家供湯藥

既歿杭太史鳩金治喪事以餘金畀市人市人悉

舉以畀徵君之子其高行古誼如此

荻汀
錄

摘句

天水同混茫宇宙妙闔闢

曉登焦
山絕頂

佳節又寒食故人誰少年

老孤湖海志貧見雪霜心

練飛下界乾坤小天挂中峰日月低

烟澄黛色分齊魯松作濤聲挾雨風

江干

字片石號黃竹江南如皋人貢生有片石詩鈔

片石偃蹇海上與徐荔村冒芥原仲松嵐宗杏原

陳小新徐弁江吳梅原冒柏銘結香山吟社

羣雅集

摘句 開過牡丹春亦倦啼殘杜宇客無歸

一去又成經歲別重逢猶是故人寒

寒食年年誰上塚一編詩草當兒孫

劉南廬墓

蔣業鼎

字升枚江南長洲人諸生

升枚風神俊雅竟體芳蘭與同縣朱桂泉人稱雙

璧祖樹存州牧父盤猗司馬皆以風雅名家居桃花塢東有倚梧巢西疇閣交翠堂諸勝統名繡谷康熙己卯尤西堂侍講年八十二樹存約爲送春之會烏目山人王石谷寫長卷記之時沈文愨公年二十七耳至乾隆己卯文愨八十七升枚佐其父復爲前會名流至者二十餘人作圖者爲林屋

山人王存慤人尤以爲佳

話湖海詩傳

摘句 白雁低寒影黃河急暮流

遠樹低青嶂孤城枕碧江

微月澹樵逕疎烟生竹扉

李 熾

字晴沙湖北安陸人諸生有僅存詩稿

余年舞勺卽好聲律見名人詩輒於私處繙閱加
丹黃二十五以詩受知於任邱邊先生越二年走
涇原復南抵粵命途多舛所至齟齬壬寅春送表
兄張省菴戍伊犁與桐鄉朱端書湘潭陳峻峯太
倉王晉源上元陳賡軒相酬和適徐炳菴以部曹
襄軍事因就正焉謬蒙印可存如千首惜西行諸
作爲人竊去良可悵耳詩未工特以性之所近境
之所歷存爲異日之驗使後人知所遭若此猶不

廢筆墨或因以自勵未可知也

僅存詩稿自序

晴沙先生祖中憲公官太守所至有惠政先生爲廉吏孫慷慨好義以親戚之故崎嶇出關往返數萬里其詩存不多頗有奇警語如登華山云緣厓轉層磴百折皆樹杪又云垂眸看雁背低首唾虎穴又云壑風忽逆擊雲響同奔泉諸峯露頂髻如海浮鳧蓮微茫一積氣爲秦晉豫燕有筆搖五嶽

目隘九州之概

聽松廬詩話

先生之孫碧山太守壬午同年也述先生中年艱苦晚境安閒好吟詠日飲酒數杯尤喜垂釣人稱

釣魚先生碧山登賢書先生猶及見之

松軒隨筆

標題

華頂祝晴適與晴會

五古

觀大獵歌

七古

摘句

不知所歷高漸覺近山小

登華山

頭承前人尻脚蹴後人額一身委十指氣

促不得歇

自千尺幢至玉女峯手攀鐵索故有十指句

登華必

冠裳星斗氣耳目海天風

嶽廟

閒身歸亦客知己卽爲家

書卷蟲鄰里苔痕雨化身

敢謂英雄多俠氣不教兒女累情腸

萬里飛來無肉食隻身歸去有綈袍

朱荏恭

字肅徵號桂泉江南長洲人有雅村堂初稿

桂泉居桐溪浜其前爲疎雨樓後爲蘋花水閣予
與鳳階策時損之來殷升枚過從來往故詩酒之
盛著于吳下後予輩入都勝游難再及戊戌南還
樓閣易主舊雨亦多物故循覽遺詩不勝聞笛山

陽之感

湖海詩傳

摘句 一逕杳無人攜樽對松酌

旗亭酒罷潮生候水驛帆開月上時

朱佐恭

字肅徵號桂泉江南長洲人有雅材堂初稿

桂泉居桐溪浜其前爲疎雨樓後爲蘋花水閣予
與鳳階策時損之來殷升枚過從來往故詩酒之
盛著于吳下後予輩入都勝游難再及戊戌南還
樓閣易主舊雨亦多物故循覽遺詩不勝聞笛山
陽之感

湖海詩傳

摘句 一逕杳無人攜樽對松酌

旗亭酒罷潮生候水驛帆開月上時

國朝詩人徵略卷三十三